



Plascheir tar mintgign tgi ò contribuia bler alla realisaziun dalla «Tgesa Nordica»: Simon Willi, mastral da Lantsch, Michael e Carola Hartweg, igls investours, Pablo Horvath, architect ed Enrico Uffer, impressari general (da san.).

FOTOS G. N. STGIER

Tge de plaschevel

Lantsch: Avertura dalla «Tgesa Nordica»

DA GION NUTEGN STGIER / ANR

■ De istoric pigl sport da biatlon, per la regiun ed er pigl pèr investour Michael e Carola Hartweg. Cun ena cerimonia d'avertura fitg ampernevia è la «Tgesa Nordica» dall'arena da biatlon a Lantsch neida surdada agl travagl. Igl interess per vurdar davos las culissas da chel bietg è sto immens grond. Surmeir, igl Grischun e schizont la Svizra disponan siva da sonda passada dad ena retezza da gronda valour. L'arena da biatlon da Lantsch, an Svizra l'unica arena per chel sport, è ossa cumpletada cun en veir «bischu» e chegl è la «Tgesa Nordica». An set meis è nia realiso chel object tgi è siva da sonda passada la «marca» dall'arena da biatlon a Lantsch. L'arena sezza è gio singulara, seia chegl digl li, dalla cuntrada ed alloura er dalla topografia. En li scu fatg per cursas da biatlon, cun en tratg tgi magna tras gòt e nateira e tgi è dalla topografia fitg variavel cun impedimaints pi simpels e pi grevs. Ultra da chegl schea l'arena da biatlon cun 1400 m sur mar sen ena otezza ideala, seia chegl per cursas u per trenamaints.

Igl bietg corresponda allas directivas internaziunalas

Avant treis onn è l'arena da biatlon neida surdada agl menaschi ed an chel curt taimp è ella ancunaschainta er sur igls confegnsvizzers. Chegl conferma per exaimpel er tgi dasper igl team svizzer èn er las squadras nazionalas da biatlon dal-

la Germania e dalla Norvegia gio stadas a Lantsch per trenar. Igl iniziants dall'arena da biatlon on retschet blers cumplimaints per l'arena da biatlon e nias ad ureglia èn els pero er tgi mantga en bietg multifunziunal tgi corresponda allas directivas dalla «IBU», la Federaziun internaziunala da biatlon e cunzont er agl basigns digls biatlets e dallas biatletas. Ultra da chegl mantgevan er ena ustareia, stanzas per sedutas digl comite d'organizaziun e la direzziun dallas cursas, tualetas, duschas ed er anc bler oter. Igl cumegn da Lantsch, scu possessour dall'arena, igls iniziants da chella ed er Swiss Ski on alloura gia bler cletg tgi Michael e Carola Hartweg, igl pèr tgi totga tar igls pi gronds amateurs da biatlon, è sto pront d'investar nov milliuns francs per chel bietg multifunziunal, la «Tgesa Nordica».

Tots èn angraztgevels

Cun Enrico Uffer, igl impressari innovativ dalla Uffer SA a Savognin, on Carola e Michael Hartweg catto en om tgi è dalunga sto incanto digl project e cugl architect Pablo Horvath da Coira alloura er catto ena persunga digl rom tgi ò mess l'idea dalla «Tgesa Nordica» an palpieri. Dall'idea tar la realisaziun digl object ò exact cuzzo set meis. Igl investour Michael Hartweg ò alloura er ludo fitg la lavour exemplarica dad Enrico Uffer cun sies team ed ansomma la buna lavour da mintga singul impressari e mintga manual. La collaboraziun seia stada fitg am-

pernevia, dei Michael Hartweg, chegl tgi Enrico Uffer conferma er. El dei tgi a Michael Hartweg seia er reuschia da fascinar mintgign pigl sport da biatlon, per las sias fegnemeiras da manar tras a Lantsch cursas da biatlon dalla coppa mundiala ed ansomma per l'antiera arena da biatlon. La confidanza fidada tgi Michael Hartweg vegia gia tar la Uffer SA, dantant er tar tot las otras firmas tgi on contribuia bler alla realisaziun dalla «Tgesa Nordica», corresponda agl caracter dad ena persunga da respect. Angal bels plets on Michael e Carola Hartweg er retschet da Simon Willi, igl mastral da Lantsch. I seia per Lantsch e per l'antiera regiun en de da plascheir cun neir surdada la «Tgesa Nordica» agl travagl.

Lod da tottas varts

Incanto dalla «Tgesa Nordica» è cunzont er Jon Domenic Parolini, igl consiglier guvernativ e schef digl departamaint dall'economia publica. Er Remo Cavegn, igl president dalla Federaziun grischuna per sport, ò angal catto bungs plets per chel bietg tgi seia en gudogn pigl sport da biatlon, pigl antier Grischun e per la Svizra. I seia propi en de plaschevel, ò er accentuo Bruno Fläcklin, igl directour turistic da Lai e conturn. Cun la «Tgesa Nordica» gudogna la regiun a muntada e sa fatscha er sen camp internaziunal en bung nom, eneda per l'arena da biatlon singulara e naturalmaintg pigl bietg multifunziunal tgi seia er ensatge pigl igl.



Sa legran digl nov bietg multifunziunal: Jon Domenic Parolini, consiglier guvernativ, Ernst Wyrsh, president hoteliers grischuns, Remo Cavegn, president Federaziun grischuna per sport e Thierry Jeanneret, uffez da sport (da san.).



Dalla parteida all'avertura: Gian Gilli, promotour da sport, Valérie Accola, promotoura olimpiada 2026, Felix Frei, directour «Hallenstadion» Turitg e Pascal Jenny, directour turistic Arosa (da san.).



Gronds ameis digl biatlon e promotours digls gis olimpics 2026 cun las tgapitschas: Baltermia Peterelli, Sep Guetg e Tona Casparin (da san.).



Dus deputos da Surmeir: Filip Dosch e Reto Cramer (da san.).



Da contemplar ed an funcziun tar l'avertura è er sto igl «Quadrin Event» dalla firma Uffer SA.



Gian Fanzun, igl architect digl «Quadrin Event».



Loscha dalla bela «Tgesa Nordica» è er Gaby Thomann, la deputada da Surses.